

Festival di dande dedica na Pampi Suarez y Roberto Orman

PREPARACIONNAN ta den su ultimo dianan pa loke ta e gran festival nan cu lo tuma lug a Diasabra Segunda Pasco den Club Caiquetio na Paradera. Manera ta conoci tin cuatro competencia di musica crioyo; dande, tipico, composicion nobo y tumba di aña nobo. Pa loke ta festival di dande ta den dos categoria; dama y cabayero. Un total di 16 agrupacion lo ta den e festival, 48 dande, 16 cancion tipico, 10 propio composicion nobo y 6 cancion tumba di aña nobo pa un total di 80 cancion.

E festival lo cuminsa pa 7 or di anochi. E festival lo duna homenahe na dos personahe kendenan a dedica hopi na cultura di Aruba cu ta Sr. Pancrancio "Pampi" Suarez y Sr. Roberto Orman. Sr. Pampi di 72 aña, manera su amigonan ta yame ta un musico nativo ya cu na edad hopi hoben el a cuminsa domina instrumentonan musical y canta.

Sr. Suarez a nace den e bario di Rooi Hundo San Nicolas. Cu apenas 15 aña el a toca cu agrupacionnan di San Nicolas y a cuminsa cu paranda di dande den vecindario di San Nicolas sea como musico of cantante. Sr. Suarez a core paranda di Dande den tur skina di Aruba pa hopi aña y Sr. Suarez ta conta cu e paranda di dande ta basta dia tras di otro y ta termina te Tres Rey.

E ta domina tur instrument di cuero, cuerda y acordeon. Sr. Pampi Suarez a forma parti di varios agrupacion musical; entre otro Los Cayeros, Orguyo, Melodicos un agrupacion di varios musico Arubano, Tipico Amistoso y alabes el a yuda compone y aregla varios cancion hunto cu su amigo cu a muri aña pasa Sr. Tech Winterdaal. Tipico Amistoso a compone hopi cantica pa celebracion di Himno y Bandera.

Otro persona cu ta ser honra Segunda Pasco ta e cantante di tur tempo Sr. Roberto Orman cu a forma parti di un cantidad di banda musical sea como cantante mayor of activo cu bandanan di nomber grandi aki na Aruba. alabes

for di edad hoben el a cuminsa cu su paranda di dande cu varios agrupacion, festival Himno y Bandera, festival di Tumba carnavales, tambe Roberto tin su nomber skirbi cu festival di ranchera. No solamente e

ta un cantante pero tambe musico y ta domina guitarra, tambora y demas instrumentonan ritmico. Cu 12 aña Roberto Orman a sali su prome paranda di dande y te awe e ta pasa paranda di dande.

Bandanan musical cu Roberto a forma parti di nan ta cuminsa for di aña

1960. Ta masha hopi pa menciona, agrupacionnan musical manera Nueva Sensacion, Impacto Musical del '67, Estrella Original, La Diferente, Patan y Ritmo, Conhunto Crioyo, Los Decanos, Tipico Pegasaya, Banda Palisia, Tico y sus Estrellas, Sodo y Cuero, Chonay y su Grupo, y Tipico Yara.